

Pablo papel tepyaca

Efeso mo'o tapatja mpes

1 ¹Napj Pablo. Apóstol* napj. Dios nin tjejyama la veles jupj mpes. Jos Jesucristo po'o velé. Nun Dios ts'uyupj, ne'aj potjaqué Efeso po'ó. Nun so coñcó Jesucristo, ne nin lojí jupj jos jin. Quina ca mpac nun mpes. ²Dios cupj qjuis Papay. Jesucristo cupj qjuis Jepa Püné. Najas yupj pajal 'üsüs lajay nun mpes. Najas ma nujola nun pjü mpes, nin la nusejay.

Dios 'üsüs la qjuisiji mpes, lovin más 'üsüs qjuiyola Dios jos jinwá.

³Najas 'üsüs velecj Dios po'ó. Jupj Jesucristo Dios. Jupj Jesucristo Popay. Jesucristo cupj qjuis Jepa Püné. Cupj se coñcocj Jesucristo, mpes Dios 'üsüs la tjiji cupj mpes. Mpes ca 'ücj polel qjuiyola nsem Dios jos jinwá. Ca 'ücj nlaca Dios pü'ü nt'a. ⁴Nosis cjuwatsja na, Dios la qjuis t'ya. La qjuis t'ya Jesucristo mpes. Mpes cupj Dios juts'a'lá. Jupj vele ma malala ncupj. Dios quelel la qjuis tjiji, ⁵mpes cupj Dios ts'uyupj qjuis tepyala, jupj la tjiji. Nin la tjiji nosis cjuwatsja na. Nin la tjiji Jesucristo mpes. Nin quelel la tjíjitsja, ne nin.

⁶Dios pajal 'üsüs la qjuis tjiji, mpes más 'ücj 'üsüs velecj jupj po'ó. Jupj la tjiji po 'üsüs. Pajal quelel líjitsja niná cupj mpes, ne nin la tjiji. Nin la tjiji Jesucristo la tjiji mpes. Dios pasal quelel liji jupj. ⁷Jesucristo 'os mpes, lovin ca 'üsüs nsem cupj Dios lal. Jesucristo 'os mpes, Dios perdonar la qjuisiji malala la tjijicj. Dios pasal 'üsüs la tjiji cupj mpes jupj quelel la qjuisiji mpes.

⁸P'a casá 'üsüs la tjiji wa. Pü'lücj qjuisin tji'yüsa, Dios la qjuis tjiji. Mpes lovin selecj tsjan más 'üsüs way la mijicj. ⁹Qjuisin tji'yüsa la qjuis

tjiji wa tsjan ca la mijis jupj p'a jawasa. Yas nam pjü ma salejeptsja niná. Mop'in jupj jostsja cupj nin selecj. Ninana Dios quelel liji, nin la mijis ca Jesucristo mpes. ¹⁰Dios ca ncawajas la mijis jupj jos jin, pjü nin tepyala na jupj jos jin. Dios ca la mijis Jesucristo ca pjü müjültüs. Jesucristo ca Jepa nsem pjü jilal nosis nt'a, Jepa nsem wa pjü jilal tsjun po'ó, jay la p'a'lá nt'a 'ots'ipj.

¹¹Dios la tjiji cupj jupj gente quinam Jesucristo mpes. Nin la tjiji nosis cjuwatsja na, nin quelel líjitsja mpes. Dios tjevele jupj jos ca nin mpalas. Pjü nin tjevele, nin liji ca nin mpalas. ¹²Dios jostsja ca cupj mvelecj püné way jupj, mpes nin la qjuis tjiji. Cupj mwalá way tepyonecj ca 'üsüs qjuis mpalas Jesucristo mpes.

¹³Nin wa nun jilal. Toponé wa. La p'a t'üç' way nun jis wala tjowelepj. Tjowelepj pasal 'üsüs. Tjowelepj mpes, nusin tji'yüsa 'onin ne 'üçj mpatjaqué Dios lal. T'üç' way Jesucristo po'o topón. Mpés nun Dios juts'a'lá nu tepyala, nin la tjiji jupj. Jupj tjevele ca jis ma'ayas jupj Cjües Jesucristo lal japon jis lal. Jupj nin la tjiji nun mpes, mpes solejé t'üç' way nun Dios juts'a'lá. ¹⁴Dios tjevele nin ca la mijis jupj gente mpes. Selecj t'üç' way Dios ca nin la mijis, jupj Cjües ty'a'acj mpes. Nin mpes selecj jupj ca perdonar la qjuis mijis, ne ca lovin 'üsüs nsem cupj jupj lal. Cupj jupj juts'a'lá. Mpés más 'üçj velecj pasal püné way Dios.

Pablo tjevele Dios lal Efeso mo'o patja mpes.

¹⁵⁻¹⁶Dios 'üsüs la nutjiji mpes, lovin wüi'sis Dios lal nun mpes. Napj nin tji'yüsa nun po poné Jesucristo lal. Nin tji'yüsa pasal quelel la sojí Dios ts'uyupj pjü way. Napj velé Dios lal nun mpes. ¹⁷Napj le mon Dios lal jupj ca nusin mü'üsüs la mijis. Mpés lovin ca jus nlayé tsjan jos jupj ca nun la müjí. Le mon Dios lal, más püliucj nusin 'yüsa liji. Mpés más püliucj ca nusin mü'üsüs Dios po'ó. Dios cupj qjuis Papay, pasal 'üsüs way, pasal püné way jupj. Jupj Jesucristo Dios. Jesucristo cupj qjuis Jepa Püné. ¹⁸Napj le mon Dios lal nun ca 'üsüs nusin mü'üsüs jupj jos jinwá. Jupj la nu t'ya, nucopj tjep'ya'sa topón, mpes nun jupj ts'uyupj quinam. Nin mpes pasal 'üsüs ca nu mpalas. Najaas nun ca jus nlayé tsjan niná jupj ca la mijis nun mpes. Ca jus nlayé pasal 'üsüs ca la mijis nun mpes. Jupj tjevele nin ca la mijis jupj ts'uyupj mpes. Jupj pajal püliucj se 'aya, pajal 'üsüs se 'aya jupj. ¹⁹Ca jus nlayé Dios pjü 'üçj liji cupj mpes, pajal 'üsüs liji jupj. Pasal püné jupj pjü jis lal. Nin liji pjü way cupj mpes, Jesucristo lal pyonecj mpes. Pajal qjuis capj p'ya'sa jupj. T'üç' way Dios pasal püné way

jupj, 'ücj pjü lo jütütj. ²⁰Solejé pasal 'üsüs way la tjiji Dios Jesucristo mpes. Jesucristo tepe'e na, Dios jas tjifyünsa yupj, tüpü'ü niswá. Dios tjevele 'ücj Jesucristo ma'ajam yupj pjwel li'inyampe tsjun po'ó, mpes selecj Jesucristo pajal püné way. ²¹Nin mpes pajal püné Jesucristo pjü jis lal. Más püné yupj pjü jepapan jis lal tsjun po'ó, más püné yupj jay la p'a'a nt'a jajütütj jis lal 'ots'ipj, nosis nt'a jajütütj jis lal 'ots'ipj. Más püné yupj pjü noypan jis lal, pjü jepapan jis lal wa. Leñ p'a más püné. Nin quinam. Lovin ca nin nsem. ²²Jesucristo jyü'ta pjü jilal. Nin polel liji, Dios la tjiji. Jesucristo Jepa Dios ts'uyupj jilal; nin tepyala, Dios la tjiji mpes. ²³Jesucristo pü'lü Dios ts'uyupj jisas mo'ó, si jütüta yupj; mpes Jesucristo jüp'üy jinwá yupj. Jesucristo jun ta'a pü'lü lovin. Jyü'ta pjü jilal.

**Tecya'liň jinwatsja cupj yas nam. Nin
tulucj quinam Jesucristo mpes.**

2 ¹Dios la tjiji nun ca mpatjaqué yupj lal. Püna nin tuluctsja nun. ²Yas nam nun ma la tjüjí Dios jostsja jin. Pasal malala la tjüjí. Nun ma qjuisastsja Dios, mpes taca'liqué jinwatsja nun yupj lal. ²Pasal malala la tjüjí püna p'in, nosis casá patja lajay jinwá. Nin la tjüjí diablo* tjifyü'ta jin. Diablo jyü'ta malalapan jay la p'a'á. Jyü'ta wa gentas, yupj ne ma quelel lajay Dios vele jin. ³T'ic' way yupj jin p'iyá la tijicj pjü way cupj. Cupj qjuisastsja, nin la tijicj. Ma la tijicj Dios jostsja jin. Gente quelel lajay, pasal malala. Lovin nin la tijicj wa cupj. Dios ca jis capj ntüliüs ninana lajay. Yupj jin p'iyatsja cupj; gente wa cupj, ma qjuisastsja Dios custjay. Mpes malala watsja ncupj Dios lal.

⁴Dios pasal quelel la qjuisiji, mpes po quelel qjuis capj p'yá'satsja. ⁵Dios vele tecya'lequecj jinwatsja cupj; ma qjuisastsja Dios, ne nin. Ma la tijicj Dios jostsja jin. Nin tulucj quinam. Quina qjuisas Dios. Qjuisas pjü way yupj velá. Dios la tjiji cupj lovin ca mpatjaquecj. Jesucristo jas tjifyünsa, tüpü'ü niswá, mpes nin la qjuis tjiji Dios. Dios quelel la nutjiji, mpes ca mpatjaqué yupj lal. ⁶Tecya'lequecj na, ca qjuisin müjünsüçj la püt'üs niswá, Dios nin la tjiji. Jesucristo jas tjifyünsa, tüpü'ü niswá, mpes nin la tjiji Dios cupj mpes. Dios nin la tjiji cupj ca mpatjaquecj Jesucristo lal tsjun po'ó. Nin la tjiji Jesucristo se coïcocj mpes. ⁷Dios pasal 'üsüs la qjuis tjiji Jesucristo mpes. Dios pjü seyasa liji na, yupj jos pjü ca jus nlayecj yupj pajal quelel la qjuis tjiji; nin mpes nin la tjiji yupj.

⁸Dios 'üsüs liji nun mpes, yupj quelel la nusiji mpes; nin mpes ca mpatjaqué Dios lal. Jesucristo po'o toponé, mpes nin la nusiji yupj.

Nun p'iyá la tjújí mpes nin liji tulucj. Nin la nusiji, jupj jos mpes p'in. ⁹Ma nun p'iyá la tjújí mpes ca mpatjaqué lovin Dios lal. Mpes ma polel welé nun p'iyá la tjújí mpes ca nin nsem. ¹⁰Dios la tjiijí mpes nin qjuis tepyala. Jupj la qjuis tjiijí p'a casá lijicj quinam. Cupj se coñcocj Jesucristo, mpes nin lijicj quinam. Dios jostsja cupj 'üsüs la mijicj la p'a mpes, ne nin la qjuis tjiijí jupj. Püna Dios tjevele nin jostsja ca cupj la mijicj.

Judiopan nin p'iyá quinam judiopan tulucj jilal.

¹¹Nujola t'as nun judiopan* tulucj. Nun popay, nun sejamay wa, judiopan tulucj yupj, mpes nin. Judiopan javelepj na nun po'ó, javelepj nun Dios gente tulucj. Javelepj na yupj p'iyá po'ó, javelepj yupj Dios gente. Yupj jat'ú niyom jis pjoloc' tsjicj way t'asiyú, judiopan püna la tajay jinwá, mpes javelepj yupj ne Dios gente. Nin la tajay Dios tjevele mpes. Mop'in nin, yupj ma Dios gente se palá, jis pjoloc' jat'ú mpes la p'in. ¹²Nun judiopan tulucj, mpes yas nam ma lu nucutsja Yom pjaní ncuwim nucopj lo p'acj. Najas nin nujola pyala nun. Dios lis t'ya judiopan. Jupj tjevele nin la mijis yupj mpes. Niná ma nun jilal tjevele Dios. Nosis nt'a potjaqué, newa ma solejetsja tsjan ca nu mpalas, taca'lqué na. Dios ma nucopj cyóñcatsja. ¹³Nun campa way tapatjaqué Dios pü'ü mpe. Quina nun so coñcó Jesucristo. Mpes ne'aj way p'in Dios pü'ü mpe potjaqué quinam. Jesucristo 'os mpes, nun potjaqué quinam ne'aj way p'in Dios pü'ü mpe.

¹⁴Judiopan* tulucj pü'lück jisas Jesucristo quinam. Yupj jilal judiopan 'üsüs quinam. Judiopan pü'lück jisas wa Jesucristo quinam. Yupj jilal judiopan tulucj 'üsüs quinam. Judiopan nin p'iyá quinam judiopan tulucj jilal Jesucristo mpes. Jesucristo mpes, yuwal yola quinam. ¹⁵Quina 'úcj judiopan ma lajay pjü way Moisés* tjiyyü'ta jin püná, mpes nin tepyala. 'Úcj ma nin lajay, Jesucristo cruz* po'o tepe'e mpes. Mpes pjü way Jesucristo jisas, pjü nenem nin p'iyá se palá. Nepénowa judiopan waytsja yupj. Nepénowa judiopan tuluctsja yupj. Nin tulucj quinam. Pjü nenem Dios gente quinam. Pjü yuwal nin yola quinam, nin pyala. ¹⁶Jesucristo tepe'e cruz po'ó, mpes quina judiopan tulucj nenem ma ts'a 'in judiopan jilal. Judiopan nenem ma wa ts'a 'in yupj judiopan tulucj jilal. Nin p'iyá yupj, Dios lis tjiijí. Jesucristo tepe'e cruz po'ó, mpes pjü nenem Dios jomicapan quinam, Dios la tjiijí.

¹⁷Jesucristo jos pjü ma ts'a 'in p'a jilal. Jupj tjac', tjevele tsjan más 'úcj la mijicj cupj, ne ma ts'i mi'inacj mpalas. Jis walap'a'a tjevele

judiopan* tulucj jilal, yupj ne campa tapátjatsja Dios pü'ü mpe. Jis walap'a'a tjevele wa judiopan jilal, yupj ne Dios pü'ü mpe ne'aj p'in tapátjatsja. ¹⁸ Jesucristo la tjiji mpes, judiopan pjü, judiopan tulucj wa pjü, 'üçj polel javelepj qjuis Papay lal, ne pjoca jupj. Dios Cjües já'asa judiopan jisas mo'ó, já'asa wa judiopan tulucj jisas mo'ó, mpes nin polel lajay yupj pjü.

¹⁹ Nun judiopan* tulucj. Nun Dios juts'a'á tuluctsja yas nam. Quina nun Dios juts'a'á, Dios ts'uyupj way nun, la p'a jinwá. Ca mpatjaqué jupj lal.

²⁰ Judiopan* Dios ts'uyupj yupj, mwalá way nin jis tepyala. Yupj Dios wo jinwá Dios lal. Apostolpan* tjowelepj, profetapan* tjowelepj wa, 'amá yumal jinwá niná, wosis la jünsüs. Wo tońca 'amá yumal mo'ó. Judiopan Dios ts'uyupj jis tepyala, topón mpes. Topón apostolpan tjowelepj, topón profetapan tjowelepj wa. Yupj ne nin tjowelepj Dios tjevelá. Jesucristo pe tsjomis jinwá. Pe wosis pe tsjomis casá tońca. ²¹ Jupj wo 'üçj tońca tsjomis mpes. Dios ts'uyupj patja Jesucristo mpes. Dios ts'uyupj Dios wo yupj, yupj qjuis Jepa Jesucristo juts'a'á mpes. Lovin más pülicj Dios ts'uyupj se palá yupj, Jesucristo nin liji. ²² Nun Dios ts'uyupj nu tepyala wa, Jesucristo la tjiji mpes. Mpes nun, pjü Dios ts'uyupj jilal, Dios wo nun. Ne'aj pü'ü Dios Cjües.

Pablo Dios mpes tjevele judiopan tulucj jilal.

3 ¹Nin mpes napj Dios lal velé nun mpes. Napj cawilta mo'o 'os, Jesucristo mpes tsji' lejay ne. Cawilta mo'o 'os, napj tjevelé mpes judiopan* tulucj jilal. Nun p'in judiopan tulucj. ²Napj pyon nun jus nlayé Dios nin tjejyama nin la veles nun jilal. Dios nin tjejyama 'üsüs nu lo pal. ³Dios nin tji'yüsa la tjiji tsjan quelel líjitsja jupj. Yas nam pjü ma salejeptsja niná. Quina tsjicj way tepyac niná po'ó. ⁴Mo'o welé na napj tepyac, ca nusin mü'üsüs napj nin tji'yüsa jinwá. Napj nin tji'yüsa tsjan niná Dios gente jis lal la siji. Jesucristo la tjiji mpes, nin liji niná. ⁵Püna Dios ma sin tji'yüsa la tjiji pjü jilal tsjan niná jupj quelel líjitsja. Quina Dios Cjües sin tji'yüsa la tjiji jupj apostolpan*, jupj profetapan* 'ots'ipj. Yupj ne jupj juts'a'á.

⁶Quina ca mpac tsjan niná Dios sin tji'yüsa la tjiji. Judiopan* pülicj topón quinam Jesucristo lal. Judiopan tulucj pülicj topón wa. Dios 'üsüs jis ma'ayas ca judiopan jilal yupj topón na. Nin p'iýá ca jis ma'ayas wa judiopan tulucj jilal. Judiopan nenem Dios ts'uyupj jis tepyala. Judiopan tulucj Dios ts'uyupj jis tepyala wa yupj topón na. Yuwal

yupj. Dios tjevele ca 'üsüs la mijis judiopan jilal Jesucristo mpes. Nin p'iyá ca la mijis judiopan tulucj jilal. ⁷Niná Dios sin tji'yüsa la tjiji apostolpan*, profetapan* 'ots'ipj. Dios nin tjejyama niná la veles p'a jilal. 'üsüs la tjiji napj lal. Napj la tjejay mpes tulucj nin tjejyama. Napj nin polel lejay yupj jos jin, yupj nin la niji mpes. Pasal püné way yupj.

⁸Napj más tsjicj pjü Dios ts'uyupj jilal; mop'in nin, Dios nin tjejyama la veles judiopan* tulucj jis walap'a'á, yupj p'iyá jostsja mpes. Nin tjejyama jis lal la veles Jesucristo po'ó. Pasal 'üsüs way liji Jesucristo yupj mpes, yupj jisas na. ⁹Dios quina quelel liji, jostsja niná sin 'yüsa lejay napj pjü gente jis lal. Dios quina quelel liji, lovin ma sin tji'yüsa la tjiji yas nam. Dios pjü la tjiji, mpes jatja yupj. ¹⁰Dios pü'ü nt'a, angelpan* jatja ne'aj, jajütütj yupj. Angelpan p'a wa jatja ne'aj, noypan yupj. Yupj pjü way tsji' lajay Dios mpes. Dios jos yupj januc yupj pajal 'üsüs liji yupj ts'uyupj jilal. Jupj angelpan sin 'yüsa liji yupj selé tsjan más 'üsüs la mijis. Jupj selé mpes pajal 'üsüs liji yupj lovin. ¹¹Püna, pjü cjuwatsja na, Dios quelel líitsja niná. Quina nin liji, ne nin pyala yupj jos jin, yupj la tjiji mpes Jesucristo lal. Jesucristo cupj qjuis Jepa Püné. ¹²'Ücj velecj Dios lal, Jesucristo lal pyonecj mpes. Ma lecj meyacj nin velecj. Selecj ca mpjacam yupj. ¹³Mpes po najas nun ma 'aplilila nu pyala, cawilta mo'o 'os mpes. Cawilta mo'o 'os, nun jis wala tjevelé mpes Jesucristo po'ó. 'üsüs nu pyala, cawilta mo'o 'os mpes.

Jesucristo pasal quelel la qjuisiji.

¹⁴Ntic' jin jünsüs, velé qjuis Papay lal nun mpes. Ntic' jin jünsüs, yupj püné mpes. ¹⁵Pjü Dios ts'uyupj Dios pü'ü nt'a, nosis nt'a 'ots'ipj, yupj jis pülcpan pjü. Nin jis tepyala qjuis Papay Dios mpes. ¹⁶Dios tsjay 'üsüs polel la qjuisiji. Napj le mon yupj lal, ca yupj po'o nujola nsem lovin. Napj le mon yupj Cjües ca nucopj mp'a'sas, mpes nun ca 'ücj nusin la 'üsüs Dios po'ó. ¹⁷Le mon Dios lal, Jesucristo lovin ca ma'ajam nujisas mo'ó, yupj lal poné mpes. Mpes nun pajal 'üsüs ca quelel lis mijicj la p'a lovin. ¹⁸Le mon Dios lal, nun ca polel nusin mü'lüsüs Jesucristo pasal quelel la qjuisiji. Le mon Dios lal yupj ts'uyupj pjü way ca 'ücj sin mü'lüsüs niná. ¹⁹Costa way qjuisin 'yüsa Jesucristo pasal quelel la qjuisiji. Ma polel nin qjuisin 'yüsa cusapj. Nin mpes le mon Dios lal nun ca jus nlayé Jesucristo pasal quelel la qjuisiji. Niná solejé na, ca nujola nsem Dios jos jinwá, nin ca nu mpalas.

²⁰Más 'ücj 'üsüs way velecj Dios po'ó. Le monacj Dios lal; newa nin, yupj más 'üsüs polel liji cupj le monacj lal. Más 'üsüs polel liji cupj

qjuiyola lal. Nin polel liji, jupj tsjay püné mpes. Tsjay pülcij way liji cupj mpes. Nin liji, jupj püné mpes. ²¹Dios ts'uyupj sa coñ Jesucristo; más 'üçj pjü way nenem lovin tsjay 'üsüs javelepj Dios po'ó. Más 'üçj nin javelepj lovin. Najas nin pyala.

Dios ts'uyupj pjü way jis pülcipan yupj.

4 ¹Qjuis Jepa Jesucristo mpes tsji' lejaj mpes qui'á 'os cawilta mo'ó. Nun Dios juts'a'á, nin nu tepyala. Mpes najas nin la müjí jupj jos jin. Dios jostsja nin lojí, la nu t'ya na. Jos nin lojí custjay. ²Ma noypan jin nujola t'as nun p'iyá. Ma lo velelé p'a jilal. Ma ts'u tji'inyá yupj jilal. Nenéyawa ma nujisas nsem la p'a lajaj. Po ma nujola t'as. Lovin nin quelel lis müjí yupj. ³Yuwal nujola t'as lovin, pjü way nun. Nin mpalas ca, nin lojí na Dios Cjües jos jin. Nin lojí na, ma la mve'lé ca nunwá. ⁴Cupj Dios ts'uyupj. Cupj pjü way qjuis pülcipan. Dios Cjües pjaní p'in, pjü qjuisas mo'o pü'ü jupj. Nun Dios ts'uyupj nu tepyala pjü way, Dios la nu t'ya mpes. Jupj nin tjevele pjü way cupj ca nlaca jupj pü'ü nt'a. ⁵Cupj qjuis Jepa Püné pjaní p'in. Pjaní mpes p'in gente 'üsüs se palá yupj Dios lal. Jesucristo lal japon na, 'üsüs nsem yupj Dios lal. Dios ts'uyupj pjü way bautizar* se palá Jesucristo lal japon na. Jisas nin se palá, jisas pjü way sin 'yüsa quinam yupj sa coñ Dios. ⁶Dios pjaní p'in. Jupj cupj qjuis Papay. Pjü cupj jupj ts'uyupj. Jupj si jütüta pjü way. Jun ta'á wine. Wama jama pjü way mo'ó.

⁷Jesucristo pasal 'üsüs la qjuis tji'i pjü way cupj mpes. Mpes pjü cupj nin polel lijicj jupj jos jin. Niná polel lijicj, niná qjuesé 'aya mpes. Ma yuwal lijicj; jupj jos jin lijicj p'in. ⁸Dios Popel vele:

“Tsjun casapa tjemey na,
ntjüi'le jilal tjemyana jupj.

Jis tje'yaya gente polel tsji' lajaj Dios mpes.

Niná polel lajaj, nin jis tje'yaya.”

Dios Popel nin vele. ⁹Dios tjevele Jesucristo viyá tjemey. Mpes selecj mwalá way la palá tjac!. Selecj tjuwine nosis nt'a. Dios tjevele viyá tjemey, mpes selecj nosis mpe tjemey. ¹⁰Palá tjac! nosis nt'a. Jupj p'iyá viyá tjemey tsjun casapa nt'a. Tjemey Jepa Püné la 'osos, pjü si jütüta mpes.

¹¹Ninana cupj polel lijicj, jupj qjuis tje'yaya niná. Nepénowa 'üçj polel jil Dios mpes, la veles Jesucristo po'ó. Nin polel lajaj, Dios jis tje'yaya mpes. Apostolpan* yupj. P'a wa 'üçj polel javelepj p'a jilal Dios tjevelá mpes. Nin polel lajaj, Dios jis tje'yaya mpes. Profetapan*

yupj. P'a wa 'ücj polel jil p'a nt'a, sin 'yüsa lajay Jesucristo po'ó. Nin polel lajay wa, Dios jis tje'yaya mpes. P'a wa lajay mpes, Dios ts'uyupj más 'üsüs sa coïn Dios. Nin polel lajay, Dios jis tje'yaya mpes. Dios ts'uyupj sin 'yüsa lajay. ¹²Dios jostsja yupj ts'uyupj más 'üsüs polel tsji' lajay yupj mpes, ne nin jis tje'yaya yupj 'ücj nin lajay. Nin lajay mpes Dios ts'uyupj pjü way más 'üsüs ca cus ncoñocj Dios. ¹³Pjü cupj nin p'iyá ca mponecj Dios Jatjam po'ó, nin ca mpalas. Pjü cupj nin p'iyá ca jus nlayecj Dios Jatjam mpes. Ca qjuiyola nsem Dios jos jinwá. Ca qjuisas nsem Dios, Jesucristo jostsja jinwá yupj Popay Dios. ¹⁴Mpes ma ca mponecj la tsuwilpan javelepj. Pülcj lyawuñ la tsuwil. Pülcj mpes sin 'yüsa la sajay. Nepénowa t'üç' way tulucj yola yupj quinam, la tsuwilpan javelepj topon mpes. La tsuwilpan nenem pasal yola tsjan más 'ücj javelepj; po jisas gente mponecj ca yupj javelepj mpes. Tsjictjacj leñ way japon yupj javelepj. Mop'in cupj ma ca tsjictjacj jinwá nsem. Ma ca mponecj cupj la tsuwilpan jilal. ¹⁵Dios jos t'üç' way velecj. Nin velecj na p'a jilal, Dios jos queel la sijicj yupj. Dios jos cupj ca nin p'iyá qjuiyola Jesucristo jola jinwá. Jupj jos ca nin qjuis mpalas cupj. Jesucristo jyü'ta, mpes jüp'üy jay pjucj jinwá. ¹⁶Cupj Jesucristo jüp'üy jinwá, cupj qjuisí jütüta mpes. Jüp'üy jas tüpwes 'a mulú; pjü way cupj jupj jüp'üy pjaní jinwá. Newa nin, Dios ts'uyupj jüp'üy pjaní yupj. Jüp'üy jas tüpwes 'üsüs na, yupj nin lajay jay pjucj jyü'ta jin. Mpes jüp'üy 'ücj t'yüna. Jüp'üy jas tüpwes nin liji jay pjucj jos jin. Nin p'iyá, Dios ts'uyupj lajay na Jesucristo jyü'ta jin, ca yola nsem Jesucristo jos jinwá. Pajal ca queel lis mijicj Dios ts'uyupj pjü way.

Dios jos yupj ts'uyupj nin lajay, nin p'iyá la müjí.

¹⁷Mpes nun jis wala velé, po ma malala la müjí niswá, Dios ma jisas jinwá. Malala yola yupj. Ma 'üsüs se palá, malala yola mpes. Qjuis Jepa Jesucristo jos napj nun jis wala velé niná. ¹⁸Yupj ma sin 'yüsa Dios po'ó. Dios lal ca mpatjam tulucj. T'üç' way ma sin tji'yüsa, mpes nin. Yupj p'iyá ma queel sin 'yüsa. ¹⁹Ma se mayca yupj lajay mpes. Yupj sin nin lajay yupj jisas jin. Pjü malala, pjü queel lajay. Lovin queel malala nyuca lajay yupj.

²⁰Jesucristo po'o nusin tji'yüsa na, nusin tji'yüsa yupj jos ma lojí yupj lajay jinwá. ²¹Nun tjapja'aqué Jesucristo po'ó. Nun jisastsja Jesucristo. T'üç' way nusin tji'yüsatsja Jesucristo po'ó. Jesucristo t'üç' way tjevele. ²²Nun Jesucristo ma nujisastsja na p'in, lovin malala queel

la tjüjitsja. Nin la tjüjí nunjisatsja mpes. Nujólatsja 'ücj nujisas nsem nin la tjüjí mpes. Nin tulucj. Malala nu pyálatsja nin la tjüjitsja mpes. Ninana ma la müjí niswá.²³ La p'a mpes nin nujola t'as quinam. Dios jos p'in, nin p'iyá nujola t'as nun.²⁴ Quina nujisas Jesucristo. Mpes Dios ts'uyupj quelel lajaj, nin p'iyá la müjí. Yupj quelel 'üsüs lajaj, Dios sin tji'yusa lis tjiijí mpes. Mpes 'üsüs ca la mijicj, Dios jinwá. Ma malala quelel la mijicj.

²⁵ Lovin ma la ntsawilí niswá. Nun sejatjampan pjü way Jesucristo juts'a'á, mpes lovin t'üçl way tjowelé yupj jilal. Cupj 'a mulú, jüp'üy pjaní jinwá ncupj.²⁶ "Nenéyawa ca ts'i mil'iná nun. Nin tepyala na, ma malala la tjüjí." Leñ way nu tjü'ü'süs la müjí, ts'u 'inyá mpes. Malala way ts'u 'inyá custjay quelel t'yaja na.²⁷ Ts'u 'inyá na, nun ca malala la müjí ca nacj diablo* jos jin. Mpes leñ way nu tjü'ü'süs la müjí, ts'u 'inyá na.

²⁸ Nepénowa tepequeñtsja. Po ma mpe'qué quinampa. Más 'ücj tsji' lojí. Mpes ca nta'á nujisas mpes. Ca 'ücj polel ma'ayá wa cjuwá jilal.²⁹ Po ma malala tjowelé p'a jilal. P'a jilal welé na, 'üsüs tjowelé yupj jilal. Mpes 'ücj jisas ca jis mpalas. Nenéyawa gente 'aplijila jatja, jisas 'üsüs mvelecj yupj jilal. Nin lijicj na, 'üsüs se palá, velecj mpes.

³⁰ Ma la müjí ne Dios Cjües 'aplijila mpalas. Dios nu tje'yaya jupj Cjües. Jupj Cjües nujos mo'o pü'ü mpes, nun solejé nun Dios juts'a'á.



Más 'ücj tsji' lojí. Mpes ca nta'á nujisas. (Efesios 4.28)

Solejé nun 'üsüs quinam Dios lal, yupj perdonar la nutjiji mpes. Nin mpes p'a jyawca na ca mpatjaqué yupj lal.

³¹ Ma malala nujola t'as nun sejatjampan sin po'ó, yupj la tjajay mpes nun jilal. Po ma ts'u tji'inyá yupj jilal. Ma jilal la tjowe'lé nun. Ma la ntsawilí la p'a la tjajay mpes. Ma nujisas t'as malala se palá yupj. ³² 'üsüs la tjújí nun sejatjampan mpes. Malala se palá na, nujola t'as yupj mpes. Jesucristo mpes, Dios perdonar la nutjiji malala nyuca la tjújí. Nin p'iýá perdonar lis müjí nun sejatjampan malala nyuca la nutjajay mpes.

Jesucristo tjevelá jaw jinwá, yupj t'üç' way tjevele mpes.

5 ¹Dios quelel la nusiji. Nun yupj ts'uyupj. Mpes más 'üçj Dios jinwá la müjí nun. ²Más 'üçj lovin quelel lis müjí la p'a, Jesucristo quelel la qjuisiji jinwá. Jupj tje'yaya yupj p'iýá Dios lal. Jupj jostsja cupj 'üsüs nsem Dios lal, mpes 'üctsja yupj lal la p'a tjü'ünan yupj. Tsjay 'üçj jos Dios Jesucristo la tjiji mpes.

³Cupj Dios ts'uyupj. Dios jos yom ma mya'na jats'om tulucj. Dios jos quepj ma jama voyum tulucj lal. Dios jos ma lojí niná, mpes ma ca nin la müjí. Ma nujisas t'as la p'a jatatj. Ma nin mvelé ninana mpes. Nin welé, nin p'iýá ca quelel la müjí ca nacj. Pjü way nun lovin la müjí Dios tjevelá. ⁴Ma lapj way mvelé yom ne'aj mya'na yupj jats'om. Ma mvelé nun ma yola jinwá. Ma lapj way mvelé, la p'a jus lo wic!. Dios ts'uyupj nin javelepj na, pasal malala Dios lal. Más 'üçj cupj wi'iquecj Dios lal, yupj la tjiji mpes cupj qjuilal. ⁵T'üç' way niyom nepenowá jamanun sejats'om tulucj. T'üç' way nequem pje'á lyawuñ jis vayum tulucj jilal. T'üç' way gente lyawuñ ma lajay Dios jos jinwá. T'üç' way gente lyawuñ, jisas p'a gente jatatj. Po jisas p'a yuts'a'á; yola niná más 'üsüs Dios lal. Pjü nenem ma ca mpatjam Jesucristo jyü'ta nt'a, yupj Popay Dios jyü'ta nt'a wa. Yupj ma la mijicj malala lajay mpatjam ne'aj. Niná po najas nun jus nlayé ca.

⁶Napj nun jis wala tjevelé Dios jos ma lijicj mpes. Nepénowa ca mvelej 'üçj nin lojí. La tsuwil yupj. Jisas nun ca mponé yupj jis lal. T'üç' tulucj javelepj. Ma mponé nun. Yupj lajay mpes, p'a jawas Dios ca jis capj ntüüs. Ma lajay Dios tjevelá. ⁷Po ma jis capj ncoñcó nun la tsuwilpan nenem.

⁸Yas nam nun ma la tjújí Dios jostsja jin. Nun püste nt'a tapatjaquetsja jinwá. Nin tulucj quinam. Qjuis Jepa Jesucristo mpes, quina nin lojí Dios jos jinwá. Jaw nt'a potjaqué jinwá nun quinam. Nin mpes 'üsüs la müjí lovin. ⁹Jaw nt'a patja jinwá lojí, 'üsüs lojí la p'a jis lal, 'üsüs

nyuca lojí lovin Dios jos jin, nin welé wa t'üc' way. ¹⁰Mpes nusin tjü'üsüs tsjan niná Nujepa Jesucristo jos nun lojí.

¹¹Malala lajay, püste nt'a patja jinwá yupj. Ma 'üsüs se palá yupj lajay mpes. Lovin ma la müjí yupj lajay jinwá. Más 'üçj sin 'yusa lojí tsjay malala niná yupj lajay. ¹²Yupj jisas pjü ma januc yupj lajay. La p'a se mayca la veles tsjan niná yupj lajay. ¹³T'üc' way jaw jinwá. T'üc' mpes, yupj ca nucucj yupj lajay malala. T'üc' mpes, yupj ca sin mü'üsüs yupj lajay malala. Mpes ca nacj ca jisas nsem Jesucristo tjevelá. Jupj tjevele t'üc' way. ¹⁴Yom pjaní nin tjevele püste nt'a lyawuñ sin po'ó. Tjevele: "I tipü'lí jinwá jipj. Tsyülümuñ jipj. Was jipj tecya'lliiñ patja jinwá mpe. Ca majawaques jipj nt'a, Jesucristo jin 'yusa la mijis mpes." Nin tjevele jupj.

¹⁵Mpes lovin 'in tjajama nun lojí mpes. Ma la müjí ma yola lajay jinwá. Más 'üçj lojí 'üsüs yola lajay jinwá. ¹⁶Quina tsjay pülcj lyawuñ, malala lajay. Mpes más 'üçj nun lovin 'üsüs lojí. ¹⁷Ma la müjí ma yola lajay jinwá. Nusin tjü'üsüs tsjan jos qjuis Jepa Jesucristo nun ca nin la müjí. ¹⁸Po ma nu tjomonas nun. Se maná pasal malala lajay, malala se palá yupj. Más 'üçj nun jisas Dios Cjües lovin já'asa nujos mo'ó. Más 'üçj lovin quelel lojí Dios Cjües nu jyü'ta jin. ¹⁹Püna Dios mpes tjenejets'eñ tapac, niná mpes tjowelé nun p'iyá jilal. Najas nüejets'equé Dios po'ó. Nin p'iyá tjowelé nun p'iyá jilal. Po tjünüejets'equé qjuis Jepa Jesucristo mpes, pjoca jupj. Pasal nujisas t'as ne nin la müjí. ²⁰Lovin tjüwüil'iqué Dios lal pjü mpes. Dios cupj qjuis Papay. Solejé Dios pjoca nun welé. Pjoca Jesucristo mpes. Jesucristo cupj qjuis Jepa Püné.

Nequem ca nin la mijicj jis vayum javelepj jin.

²¹Tsjay 'üsüs nujola nun Jesucristo po'ó. Mpes jupj jos nucopj p'o'sá nunwá. Jos nun poné nun más 'üsüs tulucj la p'a jilal.

²²Nequem, nin la müjí nuvolum javelepj jin. T'üc' way nin lojí Nujepa Jesucristo vele jin. Nin p'iyá la müjí wa nuvolum javelepj jin. ²³Jesucristo Jepa Dios ts'uyupj mpes. Jesucristo la tjihi yupj 'üçj ca mpatjam Dios lal. Nenem Jesucristo jüp'üy jinwá. Nin p'iyá niná, nun nuvolum nun jis jepapan. ²⁴Dios ts'uyupj lajay Jesucristo vele jin. Nin p'iyá, más 'üçj nin lojí pjü way, nuvolum javelepj jin.

Niyom ca quelel la mijicj yupj sejats'om.

²⁵Niyom, quelel lis müjí nun sejats'om, Jesucristo Dios ts'uyupj quelel lis tjihi jinwá. 'Üctsja jupj lal la p'a tjü'ünan jupj, ca gente Dios

ts'uyupj jis mpalas yupj. ²⁶Jupj jostsja Dios ts'uyupj Dios juts'a'á ca jis mpalas, mpes 'üctsja yupj lal nin tepyala yupj lal. Dios ma jola yupj ts'uyupj malala nyuca la tjajay mpes. Jesucristo tjevelá topón, mpes nin. Yupj 'üsü mpes tje'yas'üñ jinwá yupj. Salá jinwá jis tepyala quinam. ²⁷Jesucristo jostsja Dios ts'uyupj tsjay 'üsü nsem yupj, mpes niná nin la tjií cupj mpes. Yupj pülül 'üsü jinwá nsem. Pülül 'üsü te tulucj. Ma jus mulumulú tepyala. Pülül 'üsü ma la tüciüeme custjay. Nin p'iýá 'üsü nsem Dios ts'uyupj. Yupj ca nlüjüñ Jesucristo lal, yupj p'iýá ca nin la mijis. Dios juts'a'á nsem yupj. Dios ma mveles ca malala yupj.

²⁸Nin p'iýá más 'üçj nun quelel la sojí nun sejats'om. Nun p'iýá quelel lojí jinwá ca quelel lis müjí yupj. Yom yupj jats'om lal jüp'üy pjaní jinwá yupj, mpes ca quelel lis müjí. Yom quelel liji na jats'om, yupj quelel liji wa yupj p'iýá. Jupj, yupj jats'om lal, jüp'üy pjaní jinwá yupj, ne nin. ²⁹T'üç! way pjü gente quelel la sajay yupj p'iýá. Ja'ayapj yupj p'iýá la las. Jajamapj yupj p'iýá. Yupj lajaj jin p'iýá liji wa Jesucristo Dios ts'uyupj mpes. ³⁰Cupj Dios ts'uyupj. Cupj pjü way Jesucristo jüp'üy jinwá, mpes yupj jyama cupj. ³¹Dios Popel vele: "Yom ca mim popay mpe, jamay mpe, jats'om lal lo püt'üs. Ca quelel la mijis yupj. Manas ca jüp'üy pjaní jinwá nsem yupj." Nin vele Dios Popel.

³²Niná costa way 'in qjuisin 'yüsa. Mop'in najas nusin 'yüsa niná. Napj nin pyac Jesucristo po'ó, Dios ts'uyupj po'ó 'ots'ipj. Dios ts'uyupj Jesucristo jüp'üy jinwá. ³³Nin mpes Dios jos nun pjü way quelel la sojí nun sejats'om. Quelel lis müjí nun quelel lojí nun p'iýá jinwá. Dios jos nequem lovin yola jis vayum 'üsü yupj. Jos yupj lovin lajaj jis vayum javelepj jin.

Tsjictjacj ca 'üsü la mijicj 'ots'ipj.

6 ¹Tsjictjacj, nin la müjí nun jis papay javelepj jin. La müjí nun sejamay javelepj jin. Nujepa Jesucristo so coñcó, mpes nin la müjí. Dios jos nin la müjí. ²Dios Popel vele: "'üsü la müjí nun jis papay lal, nun sejamay lal wa. Nujola nsem noypan yupj nun jis lal." Niná lojí na, 'üsü ca nu mpalas, Dios nin tjevele. ³Tjevele: "'üsü nujola na nun jis papay mpes, nun sejamay mpes 'ots'ipj, 'üsü mpatjaqué ca. Püt'üs way mpatjaqué nosis casá." Yas nam ma nin tjevele 'üsü ca jis mpalas lajaj na yupj tjevele jin.

⁴Pülticj way nun, nuts'uyupj tjanapj. Ma lovin jis capj tjowé'lé nun. Lovin jis capj velelé, malala. Tsjictjacj ts'i mi'l'inacj nin lojí mpes. Más 'üçj sin tjü'üsü la müjí, ne lovin ca jus nlayecj tsjan 'üsü lajaj. Sin tjü'üsü la müjí qjuis Jepa Jesucristo jos mpes.

Esclavopan ca 'üsüs la mijicj wa.

⁵Esclavopan*, nun tsji' lojí nun jis patrón mpes nosis casá. Nin la müjí yupj jajütütj jin. Nujola t'as noypan yupj. Ma lojí na yupj jajütütj, locj tneyá nun. Más 'ücj nun quelel t'ücj' la müjí yupj jajütütj jin. Nun lojí Jesucristo vele jin. Nin p'iyá, la müjí wa nun jis patrón javelep jin. ⁶Esclavopan nepénowa yumüçj tsji' lajaj yupj jis jepapan januc na. Ma yumüçj tsji' lajaj ma januc na. Ma la müjí yupj jinwá. Dios jos nun lovin quelel lojí nun jis patrón witjacj javelep jin. Nun tsji' lojí Jesucristo mpes, ne ca nin la müjí. ⁷Nun jis patrón mpes tsji' lojí na, nujola t'as Jesucristo mpes tsji' lojí. Mpes 'ücj nujisas t'as tsji' lojí yupj mpes. ⁸Nun solejé gente 'üsüs lajaj na, qjuis Jepa Jesucristo 'üsüs ca la mijis yupj mpes. Nin la mijis esclavopan jilal, esclavopan tulucj jilal 'ots'ipj.

Yupj esclavopan jamanun ca 'üsüs la mijicj yupj jis lal.

⁹Yupj esclavopan* jamanun mpes ca mpac quinam. Nin p'iyá, más 'ücj 'üsüs lojí nun jis esclavopan mpes. Ma tjowelé malala ca lis müjí malala lajaj na. Nujola t'as, nun jis Jepa tsjun po'o pü'lü, yupj jis Jepa p'iyá. Jupj vele nun más 'üsüs tulucj yupj jilal. Jupj vele nun, nun jis esclavopan jilal, yuwal p'in.

**Dios quelel nu 'yaya, pjü way nt'a. Mpes
diablo ma ca polel malala la nu mijis.**

¹⁰Quina ca p'a wa mpac, ne ncawajas ca. Lovin la müjí qjuis Jepa Jesucristo jos jinwá. Lovin ma locj tneyá nun. Nin polel lojí qjuis Jepa Jesucristo nu 'yaya mpes. ¹¹Diablo* li tsuwile nun jilal. Jupj jos nin lojí jupj jos mpes. Dios nu 'yaya, pjü way nt'a nun, mpes diablo ma ca malala polel la nu mijis. Mpes ca 'üsüs way polel la müjí Dios jos jin. Ma ca la müjí diablo jos jin. ¹²T'ücj' way la p'a la palan cupj qjuilal. Gente tulucj niná. Malalapan la palan cupj qjuilal. Tsjay malala yupj. Lyawuñ jay la p'a'a. Jepapan yupj nepenowá, 'ücj jis la jütütj. Noypan nepenowá, sin tjiyocj yupj. Nepénowa jajütütj nosis casá. Püste jinwá nosis casá quinam yupj pajal malala lajaj mpes. Malalapan nenem jajütütj quiá. Yupj la palan cupj qjuilal; ma jisas 'üsüs quelel lijicj cupj.

¹³Niyom militar la palan na, yupj p'a casá sin jacüipap. Niná sin jacüipap mpes, ma malala se palá. Nin p'iyá niná Dios nu 'yaya lal. Nun Dios militarpan jinwá, mpes pjü way nt'a nun jupj nu 'yaya. Niná

mpes, ma ca mponé diablo* velá. T'üç' way p'a jawas diablo ncuwim ca la ntsawilis nun jilal. Mpes pjü way nt'a nun, Dios nu 'yayá. Niná mpes la p'in, ma ca mponé jupj li tsuwile na. Niná mpes la p'in, 'üçj ca polel la müjí Dios jos jin.

14 Militarpan la palan na, jis col tantan jatsupapj; pü'lül tsjoc' malala. Nin lajaj mpes más 'in 'üçj la palan. Nin p'iyá niná, t'üç' way welé na, nun jis col tantan tsu'pá jinwá. Mpes ma ca la müjí diablo* jos jinwá. Militarpan la palan na, yupj jisas suna c'a mpes japwijitj, mpes la p'a ma polel jatsjac yupj. Nin p'iyá niná, 'üsüs lojí na Dios jos jin, nujisas suna c'a mpes pwitjí jinwá. Mpes ma ca la müjí diablo jos jinwá.

15 Militarpan la palan na, jis tsjam japwijitj, mpes ma malala pyala jis tsjam. Nin p'iyá niná, más 'üçj nun welé p'a jilal tsjan niná Jesucristo 'üsüs liji gente mpes. Niná japon, 'üsüs nsem yupj Dios lal. Nin welé na, nun jis tsjam pwitjí jinwá. Mpes ma ca la müjí diablo* jos jinwá.

16 Militarpan la palan na, p'a wa jatatj yupj. Yupj jat' mpes, yupj jis enemigo yo jay ts'ülül palá tinca. Yupj jat' jas t'ünt'ün, la pjocotj wa, püné wa. Nin mpes yupj jis enemigo yo jay ts'ülül ma jatsjac yupj jis p'üy. Nin p'iyá niná, nun poné na pjü way Dios tjevelá, nun ca nt'a wa yupj jat' jinwá. Diablo* po quelel malala liji nun jis lal. Yo jay ts'ülül wolaqué jinwá tya'a jupj, malala la mijis mpes. Newa ma ca malala la mijis nun jis lal nun Dios lal poné na.

17 Militarpan la palan na, sombrero c'a sey jatja. Mpes p'a jasüp na yupj sey pjucj, ma cya'lïñ. Nin p'iyá niná, nun nujisas na ca Dios lal mpatjaqué, sombrero c'a nun sey jatja jinwá niná. Mpes ma ca la müjí diablo* jos jinwá. Militarpan la palan na, polomay campa jatatj wa, sey jam yupj, 'üçj la tsjac. Nin p'iyá niná, nun solejé na Dios tjevelá,



Niyom militar la palan na, yupj p'a casá jacüipap, ma malala jis mpalas. (Efesios 6.11-17)

polomay to'á jinwá niná. Mpes 'üsüs ca polel la müjí Dios mpes, jupj Cjües nin ca la mijis.

¹⁸Lovin tjowelé Dios lal. La tjomoná pjü nujisas. Dios Cjües jos jin tjowelé. Nin lojí na, 'in tjajama. Diablo* jos ma welé Dios lal. Lovin tjowelé Dios lal jupj ts'uyupj mpes, pjü way yupj mpes tjowelé. ¹⁹Tjowelé Dios lal napj mpes 'ots'ipj. Dios 'üsüs way liji pjü gente mpes Jesucristo la tjiji mpes. Niná napj ca mvelé custjay la p'a jilal. Yas nam pjü ma salejeptsja niná. Najas Dios lovin nawala mveles tsjan niná jupj jos napj velé. Ma quelel lecj meyá napj nin la veles. ²⁰Dios nin tjejyama la p'a jilal la veles Jesucristo po'ó. Cawilta mo'o 'os nin tjevelé mpes. La tjomoná Dios lal lovin ma lecj meyá, 'ücj mvelé ca. Dios jos lovin ma lecj jeyá napj.

Pablo tecyawaja tepyaca.

²¹Najas jus nlayé tsjan ne palá quinam. Najas jus nlayé ncu 'ücj pü'üs. Mpes napj ca jas majam Tíquico nun nt'a. Jupj cupj qjuis catjam. Po quelel lijicj jupj. Jupj lovin pasal tsji' liji qjuis Jepa Jesucristo mpes. Pjü way ca nun jis wala mveles. ²²Mpes napj se jam nun nt'a. Najas jus nlayé ncu 'üsüs pyatjaquecj ncupj. Nun ca 'ücj jisas nsem jupj mveles mpes.

²³Dios cupj qjuis Papay. Jesucristo cupj qjuis Jepa Püné. Le mon yupj jilal, ma nujola nsem pjü mpes. Le mon wa yupj jilal nun lovin ca quelel la müjí nunwá. Le mon wa nun lovin ca mponé Dios lal. ²⁴Pülücj pasal quelel lajaj Jesucristo. Jupj cupj qjuis Jepa Püné. Lovin ca quelel la mijicj jupj. Le mon Dios lal jupj 'üsüs la mijis nenem jilal, pjü way.